



7. november 2023

UKA23/36

Kalaallit Nunaata eqqaani imartani aningaasaqarnikkut immikkut oqartussaaffigisani avatangiisit illersorneqarnissaat pillugu inatsisip allangortinneqarneranik inatsisissatut siunnersuummik Namminersornerullutik Oqartussat ilaliinissaat pillugu Inatsisartut aalajangiiffigisassaattut siunnersuut.

(Nunalerinermut, Imminut Pilersornermut, Nukissiuutinut Avatangiisinullu Naalakkersuisoq)

Siullermik Inatsisissatut siunnersuummut Siumumiit qujavugut imatullu oqaaseqassalluta:

Siumumiik pingaartipparput avatangiisitta mingutsinneqannginnissaa pillugu suliniarnerit assigiinngitsut mingutsitsisinnaanermut annikillisaanermik siunertallit, siunertaq pitsaasuuppat tamatigut tapersersortuarnissaa pingaartitaraarput, tassami issittumi najugaqarnerput avatangiisitsinnik sunnertiasumiinnera eqqarsaatigalugu kissaatiginartaqimmat mingutsitsinerit suugaluartut sapinngisamik pinaveersaartittarnissaat piusariaqarluinnartut isumaqaratta

Naalakkersuisut siunnersuutaanni Nunatta eqqaani imartat aningaasaqarnikkut immikkut oqartussaaffigineqartut mingutsinneqannginnissaat pineqarpoq, tamanna siusinnerusumi inatsisartut aalajangersimaneranni aallaaveqartoq pineqarpoq.

Naalagaaffiit Peqatigiit imarsiorneq pillugu suleqatigiiffiata ataani uuliap oqimaatsup issittup imartaani atorineqarnissaanut assartorneqarnissaanullu inerteqqummik akuersisimanera tunngaviuvoq, tamatumalu kinguneranik siunnerfiuvoq uulia oqimaatsoq atorineqarunnaassasoq.

Tamanna ilaatigut RAL-imut tunngatillugu paasisutissat malillugu orsussamut ikumarsaatikitsumut nuunnissaa atuinerunermik kinguneqartussaasoq ersersinneqarpoq, ilaatigut aningaasartuuteqarnerulernissamik kinguneqassasoq, tamanna atuisut akiliuteqarnerunissaanik kinguneqartussaavoq, malitsigissallugulu qularnanngitsumik assartuinerup akisunerulernissaanik kinguneqassalluni, tassami nalunngilarput assartuineq akitsortillugu sunut tamanut tuniluussinnaasartoq nagtaagullu siammassissamik akil qaffaateqarneranik kinguneqartarluni

Kisiannili avaqqussinnaanngilarput MARPOL-imi isumaqatigiissut malillugu uuliap kinertup atorineqarunnaanissaa aalajangiiffigineqarsimammattamatumallu allatut ajornartumik malitsigisassaasa ilaat uani pineqarluni

Siunertaa paasisinnaalluarparput uuliallu akia nikerartuurtuummat naatsorsoruminaappoq qanorpiaq sunniutissat isikkoqassanersut, tassami ilisimavarput piffissami aggersumi uuliap akia qaffanneqartussaasoq, qanorpiarli qaffaateqassanersoq maannakkorpiaq akiuminaappoq oqareennittut uuliap akiata nikerartuurtuunera pissutaalluni.

Ilanngullugu maluginiarparput tusarniaanermi tusarniakkat amerlasuut tusarniaaffigineqarsimasut akissuteqartorlu ataasiinnaasimavoq taannalu siunnersuummut tapersiilluni oqaaseqarsimalluni.

Avatangiisitta isumannaatsuunissaa mingutsitseratarsinnaanerullu ingalassimaneqarnissaa pingaartillutigu siunnersuut tunngaviatigut taperserparput, siunertaa ajunngitsuusoq takusinnaagatsigu.



Siumuminngaanniik misigisimavugut Inatsisissatut saqqummiunneqartumi aningaasatigut kingunissai assigiinngitsut pillugit pitsaanerpaassasoq ataatsimiititaliamut ingerlaqqaarluni qulaajagassallu pingaartumik aningaasanut tunngasortai ersarinnerusumik paasissutississiissutigineqartariaqartut qulaajaaffigeqqaartariaqartut, taamaasilluni assiliaq ersarinnerusoq saqqummersinnaaniassammat.

Taamatut oqaaseqarluta siunnersuut taperserlugu ataatsimiititaliamut susassaqartumut aappassaaniinnginnerani ingerlateqqipparput, neriutigalugu ataatsimiititaliami suliarilluarneqassasoq

Jens Kristian Therkelsen

Siumut